



Na osnovu člana 24 stav 3 Zakona o Tužilaštvu Brčko distrikta Bosne i Hercegovine („Službeni glasnik Brčko distrikta BiH“, broj 19/07) i člana 13. i 14. Pravilnika o unutrašnjoj organizaciji i poslovanju Tužilaštva Brčko distrikta Bosne i Hercegovine broj: A-310/2019 od 29.3.2024.godine, te u skladu sa odredbama člana 68 Zakona o zaštiti ličnih podataka („Sl. glasnik BiH“, br. 12/2025), vršilac dužnosti glavnog tužioca Tužilaštva Brčko distrikta Bosne i Hercegovine donosi slijedeća

PRAVILA PRIVATNOSTI

UVOD

Cilj Pravila privatnosti Tužilaštva Brčko distrikta Bosne i Hercegovine (u daljem tekstu: Tužilaštvo Brčko distrikta BiH) je da, u skladu sa članom 68 Zakona o zaštiti ličnih podataka (u daljem tekstu: Zakon), svim licima čije lične podatke obrađuje u okviru postupaka koje provodi, uz izuzetke propisane posebnim zakonom, pruži informacije o obradi njihovih ličnih podataka na transparentan način.

Pravila privatnosti se primjenjuju na sve lične podatke koje Tužilaštvo prikuplja, upotrebljava ili na drugi način obrađuje, direktno ili putem drugih kontrolora.

U skladu sa Zakonom, niže navedeni pojmovi imaju sljedeća značenja:

- Lični podatak je svaki podatak koji se odnosi na fizičko lice čiji je identitet utvrđen ili se može utvrditi.
- Obrada ličnih podataka je svaki postupak ili skup postupaka koji se obavlja na ličnim podacima ili na skupovima ličnih podataka, automatizovanim ili neautomatizovanim sredstvima kao što su prikupljanje, evidentiranje, organizacija, strukturiranje, čuvanje, prilagođavanje ili izmjena, pronalaženje, ostvarivanje uvida, upotreba, otkrivanje prenosom, širenjem ili stavljanjem na raspolaganje na drugi način, usklađivanje ili kombinovanje, ograničenje, brisanje ili uništavanje.
- Kontrolor podataka je fizičko ili pravno lice, javni organ ili nadležni organ koji samostalno ili sa drugim određuje svrhe i sredstva obrade ličnih podataka.
- Nadležni organ je organ koji je nadležan za sprečavanje, istragu i otkrivanje krivičnih djela, gonjenje učinilaca krivičnih djela ili izvršenje krivičnih sankcija, uključujući i zaštitu i sprečavanje prijetnji javnoj sigurnosti, kao i pravna lica ako su zakonom ovlaštena za obavljanje ovih poslova kao posebna kategorija.

PODACI O KONTROLORU PODATAKA

- Tužilaštvo Brčko distrikta Bosne i Hercegovine
- Ul. Trg pravde broj 10
- 76100 Brčko distrikt BiH
- Telefon +387 49 217-227; Fax +387 49 219- 088

PODACI O SLUŽBENIKU ZA ZAŠTITU LIČNIH PODATAKA

e-mail: szzp@jtbd.ba

PRAVNI OSNOVI OBRADE LIČNIH PODATAKA, SVRHE OBRADE I ROKOVI ČUVANJA

Lične podatke Tužilaštvo obrađuje u skladu sa Zakonom, a na osnovu Zakona o Tužilaštvu Brčko distrikta Bosne i Hercegovine, izvršavajući svoje nadležnosti i ovlaštenja. Navedene nadležnosti i ovlaštenja uključuju:

- otkrivanje krivičnih djela i gonjenje učinilaca za krivična djela ratnog zločina, organizovanog kriminala, privrednog kriminala i korupcije i sva druga krivična djela na teritoriji Brčko distrikta BiH u skladu sa: Krivičnim zakonom Brčko distrikta BiH ("Sl. glasnik Brčko distrikta BiH", br. 19/2020 - prečišćen tekst, 3/2024 i 14/2024), Zakonom o krivičnom postupku Brčko distrikta BiH („Sl. glasnik Brčko distrikta BiH", br. 34/2013, 27/2014, 3/2019 i 16/2020)), te drugim primjenjivim zakonima.

VREMENSKI PERIOD ČUVANJA LIČNIH PODATAKA

Lične podatke Tužilaštvo Brčko distrikta BiH obrađuje dok se ne ispuni svrha obrade ličnih podataka. Nakon prestanka svrhe za koju su prikupljeni, podaci se više neće koristiti i čuvat će se shodno Listi kategorije registraturne građe sa rokovima čuvanja u Tužilaštvu, koja je donesena u skladu sa Zakonom o arhivskoj građi.

TEHNIČKE I ORGANIZACIONE MJERE ZA ZAŠTITU LIČNIH PODATAKA

Tužilaštvo Brčko distrikta BiH je preduzelo odgovarajuće tehničke i organizacione mjere za zaštitu ličnih podataka od neovlaštenog pristupa, gubitka ili drugih radnji kojima se ugrožava sigurnost vaših ličnih podataka.

Pored drugih mjera, obavezali smo naše zaposlenike na povjerljivost svih podataka koje saznaju u obavljanju posla, te radimo na njihovoj edukaciji u cilju podizanja svijesti o zaštiti ličnih podataka.

KOJA SU VAŠA PRAVA U VEZI SA OBRADOM LIČNIH PODATAKA?

Vaša prava, uz izuzetke propisane posebnim zakonom, su:

- pravo na pristup svojim ličnim podacima;
- pravo na ispravku ličnih podataka;

- pravo na brisanje ličnih podataka i
- pravo na prigovor.

Za ostvarivanje svojih prava možete se obratiti Tužilaštvu Brčko distrikta BiH pisanim putem ili putem elektronske pošte na naprijed naznačenu adresu.

Ukoliko ste nezadovoljni postupkom Tužilaštva Brčko distrikta BiH, možete se obratiti nadležnom nadzornom organu www.azlp.ba ili putem tužbe nadležnom sudu.

PRENOS LIČNIH PODATAKA DRUGIM KONTROLORIMA PODATAKA, PRENOS LIČNIH PODATAKA U INOSTRANSTVO

Lične podatke Tužilaštvo Brčko distrikta BiH može dati drugim kontrolorima ukoliko je to potrebno za izvršavanje zakonom propisanih obaveza. Također, lične podatke Tužilaštvo Brčko distrikta BiH neće prenositi drugim kontrolorima u inostranstvu, osim ukoliko takva obrada nije neophodna na osnovu zakona ili međunarodnog ugovora koji obavezuje Tužilaštvo Brčko distrikta BiH.

Lične podatke Tužilaštvo Brčko distrikta BiH daje pružaocima informatičko-komunikacionih usluga sa kojima je zaključilo ugovor i koji poštuju pravila postupanja sa ličnim podacima.


KORIŠTENJE KOLAČICA

Na našoj službenoj internet stranici www.jt-brckodistriktbih.pravosudje.ba koriste se obavezni, odnosno tehnički kolačići (cookies). Ti kolačići su male datoteke koje omogućavaju ispravan rad internet mjesta i ne možemo ih isključiti, te za njihovo korištenje ne trebamo vašu saglasnost. Obavezni kolačići ne pohranjuju nikakve informacije koje bi vas mogle identifikovati.

PROMJENE PRAVILA PRIVATNOSTI

Tužilaštvo Brčko distrikta BiH će redovno ažurirati Pravila privatnosti kako bi ista sadržavala aktualne i provjerene informacije.

Broj: A - 109/2026
Brčko, 16.02.2026. godine

VRŠILAC DUŽNOSTI
GLAVNOG TUŽIOCA

RADMILO IVANOVIĆ



Dostaviti:

- Oglasna tabla Tužilaštva Brčko distrikta BiH
- Web stranica Tužilaštva Brčko distrikta BiH